

# Sensoria

*Iz Düsseldorfa smo vidjeli...*

Iz Düsseldorfa smo vidjeli tenkove u Sloveniji.

Iz Rima smo vidjeli tenkove u Poljskoj.

Iz Bruxellessa smo vidjeli tenkove u Pragu.

U Beogradu smo ih vidjeli izbliza.

Iz Beča smo vidjeli tenkove u Moskvi.

Itd., itd.

Poslije svega se čovjek pita  
o tehnološkom napretku i razvoju stvari,  
poslije svega  
koliko im pobogu treba da stignu po njega.



## **vodim**

slijedi li mi trag, vodim  
od stabla do stabla, maglu.

napredujemo sljubljeni u međusobnim otiscima.  
sa druge strane litice  
pita se neko kao sunce  
čiji će dah  
dospjeti  
zamagliti dan.



**kultura**

tu svi miruju, kaže berber.

kao prestrašene životinje,  
na podu moja kosa nije više  
tako tamna i postaje gomila  
dok niče iz pukotina.

plativši

izaći ču stazom

vlasti.

## **povijest**

ulazi vjetar i izlazi  
jablanu iz krošnje, njiše se  
i sa njim na klatnu slika  
iz djetinjstva:

čempres raste kraj mora,  
kada diže pjenu, sa talasa sunce  
grize povijen vršak stabla.  
na krljušti ribe vidjeh  
sliku mog dječačkog tijela.

## **rastanak**

na kraju čekam tamo gdje se sreće more:  
posljednji niski galebovi, iz svjetionika žuto  
pada u trag zraka, sve je besmisleno, konačno,  
kažeš i klizneš po pijesku, silueta  
nestaje u velikom luku talasa.

dosjećam da je to bio pozdrav  
onoga što budi u noći i pita šta, šta,  
ja – otkud znam?! olakšan za jednog  
radoznalog dječaka, stupam na ulicu  
kao da plovim u pjeni karnevala.




*svjedok, krepuskularno*

šušte brzi koraci dječaka  
rasprskani u sjenima parka:  
narovi se diraju na vjetru.

oko modro magli od sive,  
studen i dimnjaka,

slika je s druge strane  
okviru svijeta: prije nego iz parka skočih,  
vidah li i tad suze neba?



**GR**

**AD**



## I. građevine

klatno i brojčanik – zamjedba i prepoznavanje.

dok bridovi građevina presjecajući se, tika-taka,  
na trenutke nisu više – grad – ruže vjetrova.  
rasklapaju se.

ne dodirujući. to nas veže.





## **II.**

### **ritam**



staneš a tebi tik  
sličan oblik u kojem  
vidiš usijane mrežice  
i kroz njih, u redovima  
jablan do drugog raste


### III. veza

sanjaš san koji može uticati na mnoge ljude:  
iz ravni izrasta ogromna građevina otporna na vatru  
jer je plamen sâma

svijet se možda prostire i pored tamne crte  
koja plavu boju dijeli na nebo i more

na donjem smo rubu, svijeta,  
galebovi su demoni od cloace  
do zvijezda, kaže kao da irida  
zrači jato kreštavih galebova.

kao da bih želio biti boja  
ne znam odgovoriti na znakove  
bliskosti, pitam, ipak,  
da li smo dovoljno blizu  
na stepenicama što gore-dolje  
vode sa kopna u more.



### lov zeca

rado bih bio par mekanih kandži  
kad brze sijeku tišinu u snijegu.

znao bih šta je smrt:

od mrtvog tijela crvena  
tekućina se daje tlu  
a pogledom prati toplost  
dok zrak savija i kruti.

smrt je gotova  
kada se kopaju  
bijele rupe u snijegu; ostaje  
čekati proljeće da rasperjane  
nosi u ostatke neba.



## **ljubav krhka – odnos krhak**

poslije zajedničke strasti slobodne igre sjemena  
turoban izlazi na polje  
pod suncem da vrši umjetničko djelo:

visoke čaše polomljenih nogica  
dugo skupljane obrtanjem postolja pod krunice  
sada, sve zajedno, naslikanih vinskih kapi,  
u nizu, veselje za svjetlo.

Nostalgia

*ulgija*



### *prozori...*

prozori leže u četiri ugla.  
kada mrakom sjećanje krene,  
izvan kaveza probudi se nula.

I.

kada  
mrznu pupovi  
na humkama poznatim  
rijetkim

II.

kada  
povlače se pupovi  
pod čempresima poznatim  
rijetkim

### III.

kada  
venu čempresi  
na humkama poznatim  
rijetkim

**IV.**

kada  
rastu čempresi  
pod čempresima poznatim  
rijetkim

## **alter nacija**

oštar jutros zrak ubija  
lastavice

i dok preko crnih zvijezda  
zabijenih u mraz gazi dah  
potpaljenoga grada

po nadiranju toplove znam  
u Levantu se gole kroz pustinju  
spajaju ruke u molitvu.

## **sad bolest, sad ljeto**

otvori oči!

eto, ptica kao ugalj  
bez glave, bez krila, bez tijela,  
konačno,  
čini shemu tijela usamljena šetača  
raširena repa šaka u nebu.

zatvori oči!

onda lagano topljenje  
zidanih zdanja i pretakanje u talas  
jasno narezanih figura vrelog zraka.

drugo se ne zbiva.

još samo nar  
zagriven iz straha  
kada krene ljeskavi disk  
iz sve manje neba.

## rana koja šeta – ljeto

prolazeći tankim slapom vreline  
kraj dimnjaka, ugljenisana s one strane:  
                                ovdje, između sasušenog koralja  
rogáča i grebénja vertikalnih nizova kore:

ranjena opeka. smrt je potonja,

sada si vrućica: skup vrućih zrnaca  
                                pripremnog procesa,  
lepet suhih krila u polju žmirkavom od sunca.

to je zenit. oštri prah osipa između vida geometra  
                                i vrtloga od kamenog žara.

a dolje – bešumno odvaljeni blokovi usijana  
                                ferruma, sve brojniji.

## **šetnja blijedim parkom i udio u vrevi parka**

šuškavi predio igre zraka sa zapuštenom  
životinjom  
na pjesnikovu grobu i lišćem pokradenih krošnji

## **LAV JE NA GROBU ŽIVOTINJA**

iz tjemena lava smiruju paralelne šipke rđe  
a onda nestaju  
mnogo prije kestena

## **KESTEN UZIMA JESEN**

lišću poslije palom  
prilazeći kiša otkriva globus  
globus do globusa  
redom kojim venjenje ulazi u buket

globus do globusa, vraćajući, globus do globusa  
blaga dječja lica



## **korak do mrtve prirode – zima**

kao čudo od krede je bijeli mogranj  
na prahovitoj obali fontanice, ukras od barokna  
odsustva.

prsne li resko, pokaže boju – glasanje puževa  
svoda u bijegu  
majolikom, ledenom majolikom, srezat će šum  
vodenog skoka.

i onda,

u ledenoj kiši, kako znati, da staru i beskrajnu  
prst ranjava baru?

## **ostanak u svijetu**

### I.

ovako: tijelo velikog čovjeka u moru...  
nisko padne li svjetlo, stiču se odbljesci i vade ga iz  
pukotine talasa.  
upravo koliko sticanje traje.

### II.

ili ovako: nekada je mjesec mlad.  
u sjenci momci skidaju kaiševe  
i nagi se vješaju. Takvwo je i nježno  
suho cvijeće na jugu, strukovlje: igra udarajuć o  
sipki zid.  
ritmovana uznenirenost i težina zraka.

### III.

roditelji bude a djeca sahranjuju. po Heraklitu  
to od vas prave pola kamilu – pola raketu. pijmo  
zajednički u pustinji  
i ispaljujmo se naglavačke!

ostanak u svijetu po ma koju cijenu.

## **eroska**

uljano sunce sočiva, ispod kap  
klizi niz žilu lista, rastući.  
zeleno otkida se jedro. u modro leti.

tako dok spavam između tvojih listova.



## **samo zadovoljstvo**

kao da je sjenka  
od pepela i jata  
u zimskom letu  
ne može tren  
stati  
da vidimo i nebo  
lomi se i plače  
komad blagog tijela  
utisnut u veće

# osjećanje

u predvečerje u prozoru  
sa britkim sjenkama letača  
stapamo se i rastapamo

kao da su tijela samo od pojmove  
kažem  
izgovorimo li i riječ više  
rasijat ćemo se kao jato  
ptica  
i umrijeti od straha

## **i jesen as su spaljivali lozu**

hodao sam između guštera i nizova kamena  
i baš kao u djetinjstvu su ptice  
bezimene i crne dodavale život  
dimu kraj sepeta grožđa.

razlikujemo se onaj dječak i ja,  
kazao sam starcu u mrkoj haljini,  
kako mi sada nedostaje riječ da znam  
gdje smo, vadeći iz usta  
zapaljenu Opatiju.

## drugo mjesto

u susjednom dvorištu

ljeto je počelo: s mirom  
nožica i mrava na  
ljubičastoj bradavici  
koju majka dosadne djece  
izlaže suncu i mom prozoru.

ružičasta gubica i ružičasti spol,  
kao čuveni pozorišni glumac  
iz podruma iskače pas i siše  
gustu tečnost, zaostalu.

pogled skrećem unutar: nedovršeni  
motivi zimskog perioda, ostaci  
narančastog se probijaju kroz mraz  
i prigušene farove automobila  
izdužujući sjenku i mlaz mokraće  
kojim se lako zabija u snijeg.

## **ljubav propala**

### *Dragi moj*

zrak koji pogled siječe na dvoje  
i tjera daleka svjetla japanskih sijalica  
da trepte kao što svijest podijeljena trepti  
i konačno svoj oblik dobija u riječi

veže nas  
obostrano  
kao što veže

plavetnilo raseljeno u sjajnim pločama  
mramora i nagost zemlje i blata u zemlji  
da ni veliki, najveći prasak ne sklopi ih  
u dom dostojan zraka koji siječe

*na dvoje*

## **opravdanje**

### I.

visok čovjek izbjegava automobile  
prelazi ulicu i prilazi ženi  
pitanje – gdje je most samoubojica.  
žena je ljubazna, širi ruke  
pokazuje pravac i objašnjava pravi put.

### II.

vitka figura na svom putu za širokim zamahom ruke  
pronalažeći most, dijagonalno, kratko se trznuvši propada,  
iskrižana odsjajima sa metalne žice, poslije  
nevidljiva, blizu same rijeke.

### III.

žena koja bi i muškarac mogla biti pogledom pretražuje  
naslove izvještene na kisoku, ulazi u bar tek da popije  
kavu, izlazi i zaostaje ispod znaka tramvajskog stajališta.  
iz pravca grada se prije svega pojavljuje usamljena  
figura čovjeka.

### IV.

tramvaj, neparna naprava u kružnici grada  
zmija koja opisuje biblijske teme  
na njoj stoji rafiniranost keksa sa tamnim prelivom  
fotografijom i sloganom: hoćemo li opet?

## **podizanje bolnice**

opraćemo rajčice i voće  
i napuniti bocu vodom.

sjedićemo ispod stabla  
u dvorištu razrušene bolnice,  
kazujući u stihovima: tako je  
i na početku bio hladan kozmos.

hlad večeri ideje jasnije sa papira skida,  
tada bolničari iz osvijetljenih zgrada  
na kolicima od metala sakupljaju mrtve.

tako bez riječi samo kamene životinje  
i hram u gradnji; ležaćemo oko vode – boce  
dok tama mijenja dan, starijim očima  
motrit kako postaje sve svemu blisko.

## sjećanje

zvala se Moammed Sceab ili Marcel  
ptičica rasterećena bratskih veza  
a ja je navodno nisam poznavao  
i sa prepuštenošću zajedno  
odmara pod mojim nogama

u ovom danu vesele rasprodaje  
ženske nadlanice od tkiva ribe  
iskaču iz talasa mekih tkanja

na placu sa tezgama su i narovi  
i sabljarke a na vrh suncobrana  
šiljci čelika kao meta

ako se njegova trava digne  
ispod anđela kapije od rđe  
i  
ispod anđela kapije od rđe  
išeta još ko zna da je živio

## **mrtva zona**

ja sam tvoj Filip, kaže misleći na jezik ševe, moj  
pornografski roman u nastavcima, između  
praznina u tijelu i identitetu

vozimo autoputem i iz limenke pijemo pivo,  
žuto ožujsko sunce nisko sa zapada  
koči zjenice i pojačava intimne mirise.  
oko nas javnost prisvaja vrijeme  
sa komedijom oko tobožnje smrti.

ptice koje prelijeću kola u daljini  
svjetlucaju kao šljemovi u pokretu, mrtva ozbiljna  
limenim zatvaračem reže kožu ponad pulsa,  
zaustavi odgođeno vrijeme, kao da me čistiš,  
ja sam tvoj Filip sa ranom koja strašno boli.

putujući izbavljamo vrijeme i opravdavamo tragedije,  
eto, sve to mogu jezikom skupiti u njenoj krvi, mjesta  
gdje obično štrca svježe,  
cvjetne parfeme.



## mrlja – simulacija oblika

za ime boga ne brišite  
ovaj trag svjetlosti  
poslije buđenja koji ostaje  
na rukama slikara.

mjesto utjehe za najbliže  
kada u noćima bez dodira  
sumnjuju da diše i postoji.



KA  
MENA  
LICA

## kamena lica

sve bilo je na dohvati ruke  
dok su dječaci sjedili na žalu  
kao kajsije otvarajući blaga lica  
kamenom otoku u zaljevu bez povjetarca,  
čega bi moglo tamo biti, blaga  
tajnih jazbina, skrivenih duša,  
niže se sadržaj cjelokupnog svijeta.

tamo su samo okrugle žabe  
sa sisama k'o u ženà, kazao je barba,  
koje od tikvica prave plovke, od djece  
prave školjke i sviraju na njima.

neki su jednom pobjegli  
da učvrste vjeru u cjelokupnom svijetu,  
u začarane žabe dječaci ne vjeruju,  
vratise se kao težaci i musketari,  
na svako pitanje odgovaraše sa kamen,  
pijetra... i naposlijetku, kada smo se rastajali,  
rob slike otkri: kamen na kraju odlazi u more.

## **igra kamenih lica**

na svakoga će jednom doći da osjeti  
maštovitu ruku onog ko bi sada želio biti.

mali ljudi sjede oko stola, ispod table  
nevidljivi i njegova užarena ruka.

važno je gledati pred sebe i u druge  
kada te otvaraju prve strasti biti miran,

pusti sjeme i budi miran, kazna je biti dolje,  
klekneš i biraš između koljena do jauka il' krika,

pretvaraš znoj u ljubav, možeš li to?  
te pribrano se vraćaš u krug oko stola.

postoje i neki što neprestano vrište,  
ti su najgori u igri kamenih lica.

## **fieste kamenih lica**

dječaci, većinom crni, stoje u krugu  
okruženi neboderima solidarnosti.

pali se bombica i ubacuje u krug.

najbliži dugo čeka, šutne je – bez volje,  
najbliži dugo čeka, šutne je – bezvoljno,  
najbliži dugo čeka, šutne je – bez volje,  
najbliži dugo čeka, šutne je – bezvoljno,  
najbliži dugo čeka i šuta je bez volje,  
u krug, rasipa se, konačno, u tisuće  
svijetlećih atoma.

BUM! ne uznemiruje  
priyatnu atmosferu u kulama  
u zraku: metalnim češljevima  
djevojčice dotjeruju dlačice  
spremnim bundama roditelja.  
**NOVOGODIŠNJA NOĆ**





## kamena lica u izgnanstvu

lijevo, uvijene tračnice pruge,  
desno, plakati sa slikom mora,  
pozadi je bar gdje obično kupujem karte,  
u odlasku, reklama turističke agencije,  
crvena fasada, oker stubovi, lijevi portal,  
još par koraka i izvlačim sitninu za kartu,  
sedam puta dvadeset tri stepenika do kabineta  
gdje se radnim danom u određeno vrijeme  
viđa grupa kamenih lica, većinom nedorađenih,  
za koje se zna da je majstor nepouzdan;  
ponekad ih bezuspješno crtam.

možda im tajno doturam novosti iz svijeta.

## **smrt kamenih lica**

jedan iz vremena kad smo kamenili lica  
uveo je pojam smrti. izvjestitelj  
o automobilskoj nesreći rekao je:  
samljelo ga kao škriljac.

nemoć

ako me voliš

ubij se

ako me voliš

ubiću te

ako se ubiješ

neću te

moci

*muškarac sa psom...*

muškarac sa psom.


žena sa mačkom.

slikar sâm.





*i druge pjesme...*



*ja...*

ja  
neiscrpna nada  
ja  
nakaza  
ja svemoćni  
ja začetnik  
ja veliki  
ja snažni  
ja gordi  
ja  
ja  
ja  
ja  
od MENE neonka počinje  
u meni gasne  
ja sam sve  
i ništa  
ja sam ništa  
i sve  
nema me  
i ja ja ja ja sam  
tako veliki  
ja ja ja ja  
mnogo volim  
i ja ja ja ja sam DRAGAN STENEK  
u tebi

## *odbijam...*

odbijam biti biser iz snova dragocjene kutije  
odbijam čitati priručnike o lijepom ponašanju  
odbijam piti sa izvora vila  
odbijam spavati na bijelom prahu  
odbijam reći koga volim  
**ODBIJAM**

ponekad sam nestašan i mal  
ponekad se uspravim u inat plafonu  
                  s lastavicama pljuckam na ljude  
                  s mravima gledam damama pod suknce  
ponekad uronim u centar zemlje  
ponekad sam zao i velik

## *PONEKAD*

ponekad hoću  
                  neću  
ponekad jesam  
                  nisam  
ponekad odbijam  
                  odbijam  
**PONEKAD**

## *mljeko...*

mljeko s okusom sljeza  
bjeloputa orgija bedara  
i ram od modrog vihora  
oko uzavrelih bajama,  
tvoj otrov, moj otrov  
otrov  
bezbojni napitak od sna,  
šećerlema ubrana na dalekoj planeti  
otrov  
majski nišan na grudima,  
trepavice oslijepljene krvlju  
otrov  
otrov pod rukama  
slijepog svirača betoniranog  
na raskršću glavne arterije  
otrov izmiče oku lovca  
pljuje vlastiti bivak  
i vodi ljubav sa ženom  
lovočuvara  
otrov iz mljeka  
ocijeden iz bedara  
slijevan niz repove vihora  
tajna rasprsnutih badema  
otrov  
tvoj otrov, moj otrov  
naš nektar, taj otrov

## *vrijeme...*

vrijeme je jasnih igara  
i razapetih pod jastukom oda  
vrijeme kada se ne umire  
niti se rađa u ovo vrijeme  
isposnici iz klubova samo  
pohode groblja  
malo je nadutih puti i slabo se rađa  
tvrdimo  
bilježeći poene u vrijeme jasnih igara  
liježemo u postelje  
pod jastukom tražimo raspeće  
pribrano ispituјemo  
spolnost u svemogućeg klinje  
zadovoljni rimom i mirisom  
vodimo ljubav  
u z  
duge zore  
a  
oko nas  
pucaju kocke odbačenih igara  
otpadnice cvile  
vodimo ljubav  
ništa predigra  
samo  
jasnih igara  
i  
raspetih o, da  
u  
ovo vrijeme  
sada



## S kopljima jedini NEBU ti

razmknuti skuti ratnički ti golicaju noge  
rane podatne su suncu  
i grlo drago nebu  
i pjevaš  
i zoveš  
i izazivaš  
munje stambolske  
a polje je veliko i nježno i tvoje  
a božuri polegli pa glave na Istok okrenuli  
a orlovi se odbili i sikću u prazno

nježne su bile zore pod božjim blagoslovom  
i ženske ruke u igri preko pleća  
a polje puklo crveno i šumno  
pa ne da leđa odvojiti ni noža primit  
i vidiš: božur samo s naličja  
a opet: pjevaš  
i zoveš  
i izazivaš

### *zadnji Helen...*

zadnji Helen i njegova smrt  
dugo su njuškali oko vrata hrama  
zavirujući u njedra  
kamena od tamne zemlje  
i ženske cike

jasmini su cvali našom rutom  
i cijeli dan djeca su plakala  
noću starci padali  
na koljena  
i šaptali

posljednji od njih danju je plesao  
noću oštiro sablju i riječi  
kidalo cvijeće  
malo jeo  
nikako pio

pali smo u zaborav

iz naših utroba ulje su cijedili  
male aveti su cijedili  
on nije se opirao  
samo je plakao i gledao u sunce  
spavalj smo  
zorom je doplovilo preplanulo ulje sa obala Helade  
i u njemu nespokojne uspomene  
na posljednjeg od njih  
zadnjeg Helena njegove suze  
i malo malo sunce

## **H. Humi**

Kikot se razlegne  
po čokotima  
i ja znam:  
Neretva teče  
gusta i milo

Zašapće intima  
preko proplanaka  
i ja znam:  
ogleda se mlad mjesec  
u tugi srne  
mek i vlažan

Prhne li uzdah  
preko visova;  
siguran sam:  
živi duh  
divan i naš  
i slika  
zvuke

**kretati se u azilu kao sepija u moru**

tvoje teško lice moji prijatelji ne vole  
jer bi htjeli da si ptica, daleka meta  
laka u ogoljelim jesenjim šumama.  
Dirati se tako nježno da se  
potpuno zapadne u vlastite samoće,  
dvije - svjetlucave naprave, jedna do druge  
ljubav i dodir, dvije samoće.

prije nego su ga ustrijelili  
pjesnik mi je napisao pjesmu:  
bog ne opršta ljepotu.

počiva tih u zemlji u kojoj su još samo mravi  
zaposleni, zadovoljni; pamtim neke njegove pjesme  
ali ih nemam kome kazati.

### Un Giorno Perso

## **šta kaže Fillipo Tommaso**

1.

Ako nas vidi, vidi  
čitam pjesme, plaćaš  
pijemo pjenušavac  
ponovno ulazeći u grad

2.

kristalići soli padaju  
sa osunčanih tijela  
iz tijela karmina koji vene  
večer izdvaja jedinku i šalje preko borova

3.

Da nas FM vidi  
smirenim glasom bi rekao  
da smo pažljivi, blijedi  
kao i na početku rasta,  
dok okljevamo na ulazu u grad

*tako se umire...*

tako se umire  
dakle  
nečasno zdrobljena bodeža

a stari gospodin u hitonu  
i nježno spaljenom perju  
tako zovno dijeli članske karte  
u čekaonici prve klase stanice  
u Berlinu

i vjerovat je trčati kroz perle  
dok ne padne jedna od posljednjih  
jabuka

ogriz  
griz kap  
iz po  
tunela se čuje kap

vrata žene će se otvoriti

krstom preko leđa toni, nečastivi  
moje su se želje oblacima smilovale  
i samo još rane  
vežu me za iris  
i gudače

papir i lice nejasno i sretno  
gospodine, gospodine  
ta vi ste grobar  
lice sretno nestaje u škrinji  
od papira

tako se ubija  
dakle  
nečasno u lošem dekoru  
ka

p  
po  
k  
a  
p  
iz tunela  
neko novo osjećanje  
mama najmlađi sam

*poštovani džokeji...*

poštovani džokeji na svakom uglu  
namiguju  
za cijenu korbača ne pitaju  
tepaju, vode u toplu arenu  
mrse grive i jašu  
jašu do posljednje kapi

Grofice od Sedla  
vole da me imaju  
volim da me imaju  
Grofice od Sedla

arenom se ori pljesak  
i bacaju se lovori vijenci  
a slijepljena je griva  
i dah još dugo ostao pod zatiljkom  
korbač se polomljen valja u prašini  
i gle, iz usta mi izvire  
dim bez vatre

*gledala me...*

gledala me  
umorno i dugo  
potekle su rijeke drAgocjene  
a ona  
gledala  
gaSnutih trepAvica  
i sMrvlJEnih bedara  
preko slinavih čaša  
i uzdahtalih mesa,  
oooj, dajte  
žestokog bika(?) u utrobi  
i polen sa kišom  
iz neba nakapan,  
gledala me  
uMorNO i duGO  
kučka očiju boje požude  
i nepresahle  
su rijeke dragocjene  
a veliko je ime strasti  
halapljiVO grLIO moja leđa  
preko slinavih čaša  
i uzdrhtalih mesa

*dok plivam*

dok plivam  
na druge strane  
osmoljenih figurica

na mjestu ruže  
strgane izrasti krin

očekujem i dalje

1988.

## **Prenuti (se)**

Sklisko polje oka u-sitnije-ne vodi onamo.

More kao čemprese zimi – to je rat!  
malih sablasti prolazne panorame:  
komadi katrana pužu bjelucima.

Ima li vremena pri-sjetiti se: tamo, u ničemu  
prebiva pogled i razjeda mrak, ovamo neprobojan?

Vraćajući stalnost krošnjama  
smrt izdišemo u nepoznato  
bojište, gle! poznatom ulicom postalom.

Rim, 26. 2. 1989.

## Zrcalo

Pogledajmo se. Nanovo. Jedan oceanski pogled.  
Krajnje stilizirano pogledajmo se nanovo.

I mekanu prevlaku zamijetimo između. Vosak,  
dok se kruti, nesiguran na suncu.  
Točka parabole: vosak. Tajna iskrenog preslikavanja.  
Tamo, s lijeva ni prošlog niti budućeg.  
Tu, s desna – postaje li treće.  
Treće je garancija. Uzajamna.

Gledaj me. Neprestano. Kada okrenem leđa.  
Nanovo. I s večeri. Naši medasti pogledi.

## **Vokativ**

Apsida u nebu. Uz četvrti kat.  
Izračunavam sjedište iskrivljenih borova.  
Ekološka kapija. Sve do drugog gdje!  
Pali se glas. Svjetiljke protiv magle.  
Znak smisla i razuma. Neospornog. Neosporno.  
Prisiljen sam kročiti. Jer sudjelujem.  
U smjesu prostora i kisele pare. U slavu vojnika.  
Dvolikujućeg u streljačkom stroju. Sudjelujući.  
Kao prvi dopušteni opijat. Odraslih i uniforme.  
Stupanja u svijet. Vokativ.

Rim, 13. 3. 1989.

## **AG**

I nestajati zjenicom postajući.  
Pojavljivanje će nestankom postati,


kada nestaje ljeti trag,  
igrajući nad šiljcima  
nedostupnih kamenih obzorja.

Slabost sumnje kao lepet kasnog jata  
utvrđuje nanose noći u sumrak.

Lišću, poslije palom, prilazeći  
kiša otkriva globus do globusa,  
vraćajući blaga dječja lica.

U pukotinama oceana nestajući  
talasom lahor licā postaje.

1989.



**samoća**

ali

staru i beskrajnu  
prsti ranjavaju baru

ledenoj kiši

unatoč

Sarajevo, 17. 5. 1989.

## **Progon**

Istom nervu različiti tlaci:  
tiki i atlaski.

Tu munju dok razlaže usijano nebo  
(na lijevo i desno) pronaći ćeš  
ranivši neprijatelja u dubokoj vlazi  
dobošom od metala...

Bolest:  
talasanje gmazova  
rožnjačom uokolo: to je strijepnja  
pri kolebanju igre ili nemoći – da li će  
postati okvirom vida  
ili će gmazovi ustrijelit se

konačno!

Bijeg:  
odreći oči i na ploči azbestnoj  
gurnut ih  
u pucketanje doboša; to je zamiranje gotičke tjelesnost  
u jednoj točki  
– da se kandidate probude  
figure i sjene

b1  
b

*Crta počinje...*

Crta počinje gdje  
sumrak sniva.  
Bivaš li igdje  
da vidiš krv?

*bum bum tras...*

bum bum tras  
tačno bravo čestitamo  
tana nana na, na! brzo kratko jasno  
smjelo!  
jeste  
tako tako, efikasno snažno  
dada hophop hip  
svakako  
  
gle! i bit  
ak se sa  
krio

*od Dio opasne...*

od Dio opasne  
li krivine damasta blijede  
arijevke dječaka kose  
jesenjeg mirisa

moj uzneseni ☿  
mladog hermelina čekaj  
kap iz moga bedra  
da upije koža lišena  
vjetra i ujeda

otkrit ćeš sedam puta začuđenu  
riječ ennui i reči lijane  
možda nisu božanska  
stvar igre nego pritajena  
požuda kaleži i tijela

*ti u meni...*

ti u meni  
ja u pjeni  
ja u tebi  
ti u pjeni

opet padaju ručnici  
opet padaju mladići  
na moja bedra  
na moja rebra  
hiljade zločina  
hiljade ratnika  
dolaze zbog tebe  
nosim ih na rukama



u plavoj kupaonici  
sa zelenim šamponom  
pjenasta princeza  
sa umornim bogom

opet padaju luđaci  
opet igraju pajaci  
na mojim usnama  
u mojim grudima  
opet se bude čežnje istoka

zbog tvojih osmijeha  
zbog tuđih kreveta  
ko grumen/kuglu šećera  
topim te u vodama

## **put oko spomenika**

(izbor iz istoimene rukopisne  
zbirke 99 haiku-pjesama)

6.  
vlat po jednu vlat  
u smjeru oblika je  
korak naprijed.

7.  
korak naprijed  
okončavanje je kruga  
u crnom suncu.

I.  
4.  
daleki šum  
kockica i kristala.  
sivo znamenje.

7.  
poznata slova  
o netaknutom licu.  
sivo znamenje.

II.  
6.  
iz vlati trave  
tamniji oblik raste.  
riječ prestaje.

7.  
dođe li vjetar  
u pretekle šipke rđe  
– zvuci metalni.

8.  
diže se oblik  
i potom nestaje  
mnogo prije krošnji

V.  
1.  
voćka u sutor  
ispod treptavih krila  
srž pokazuje

VII.  
3.  
lepetom krila  
garava ptica takne  
tjeme statue

8.  
sjenke polaze  
iz mračnog oka kipa.  
noć zasigurno.

# *dok sveci marširaju...*

dok sveci marširaju  
miran sam i bavim se  
pupoljcima ruže  
pomalo se otkine pa preko  
usana divljih pasa preplete se kolo  
i u planinu nekada  
moja divljač, moje žrtve ne ginu  
one sretne ponovno izazivaju  
sokove lovca  
to je moja ljubav

## **Obnove, buđenja**

Svaki svoj trenutak  
ja sam živio  
i drugi put  
u vremenu utonulom  
izvan mene

Daleko sam sa svojim sjećanjem  
iza onih izgubljenih života

Budim se u kupki  
dragih stvari običnih  
iznenađen  
i raznježen

Hitam za oblacima  
koji se rastaču blago  
pozornih očiju  
i podsjećam se  
ponekog prijatelja  
mrtvog

Ali, Bog – šta je to?

I preplašeno  
biće  
prijeći oči  
i prima  
kapljice zvijezde  
i ravan muka

I osjeća se  
osviješćen  
nanovo svoj  
povraćen  
sretan (sebi)



## Tlo rasut(o) oblikujem se

Potpuno na kraju  
razuzdan od uplašenosti  
obično biće od straha  
više ne udara vrijeme srcem  
nema vrijeme ni mjesto  
sretno je  
Na usnama mi je  
poljubac od mramora

## *Kršenje pravila...*

Kršenje pravila igre linije daje  
licima izraz uzvišene na sē okrenute  
potrebe za zavodničkom patnjom  
mladog tijela upletenog  
u iskrzane i prokletne nespodobne  
konce lutaka sa jesenjih  
bulevara  
Kršim pravilo i uzvišeno se  
podsmjehujem mladoj letačici  
proljetnog sutona  
od rupe do rupe sudbina se  
uvijek vraća  
izraz ptice je izraz bolnog zadovoljenja  
novog ljubavnika najljepših zubi u  
gradu  
vršeći obred od trpeze do trpeze  
ona je (ptica) kršila pravila igre  
uzvišeno krijući pod nebeskom raskošju  
perje u(m)noženih na dohvatu ruke boja.

***pamte se...***

pamte se izgnanici u oluji  
okamenjeni pred psovkom i bajunetom  
najvatreniji ljubavnici zemlje-kurve-princeze iz bakinih priča

pričali su  
pokloni se svakoj riječi, svaka je ubica iz zasjede  
tačkama joj put ne prijeći  
a u pustinji je tako ravno i svaka se mrtva prebrat može  
dok se vjetar ne digne, crven i razigran,  
to ludo stvorenje s tisuću jezika tako milo  
obara vojnike na strazi  
i poigrava se dragim lešom nad velikim pijeskom  
tako pričali

zna se drugovanje njihovo s opatom iz hrama morskih medvjedica  
čedo od jauka ih napaja ispod zjenica nakvasalog neba  
i čuva od prevrtljivih voda,  
a bivalo je i većih vjernika,  
a oni  
s majskim dahom-provalnikom-saveznikom velikih vjetrova  
eto, nisu, a jesu  
čeli mnogih priča o riječima i vjetru  
i opet ostadoše stajat pred bajunetom i sleđenom psovkom

## ***Prhnula...***

Prhnula s mojih usana  
iz srca Edena krilati ljiljan  
s Olimpa iznektari  
otrov jasminā  
ostavi me mumijom utopljenog

Naše vino  
vino istine, vino zaljubljeno  
kristalne čaše čuvaju naše vino  
pjeva krasni rez  
mami ružičast val  
jasmina s okusom višnje  
traži da ga zbrisem  
na prozirnom rubu jave  
naše vino je ostalo  
na sredini sobe  
sunce Hercegovine obasjava  
moje uzglavlje  
naše vino jedino  
i stihovi spjevani  
u letu lebde  
lebde ždralovi bez cilja  
lebde stihovi ostali  
bez usta.

Prhnula si do neba  
vinula se divlja ruža  
gledam i ne vidim  
plaho sunce zbrisalo  
tragove bića  
plaho sunce prijeti prstom  
nestašnom dječaku  
skriva ružu iza  
leđa

# *Riječi...*

*Riječi, riječi*

Nesretnice, narikače

Treba riječi poroditi

Nikada

Baciti u rječnu klisuru

*Riječi*

*Riječi Riječi*

Rasplakana dojenčad što slute smrt

Padaju između šina i vode ljubav

Sa željezničarima

Nedonoščad sa šumskih panjeva



*Bilo je...*

Bilo je to neke zime  
u nekom klubu  
ona i neki ja  
i muzika  
ples za nikad poljubljenu  
kako sam je ljubio, kako sam  
pio i pjevao i gledao  
neke zime u nekom klubu  
u podzemlju


## *Znati...*

Znati ko je ukrao moj put  
a ona okrenula leđa  
u one lude dane  
crvenih vjetrova

Gledam a ne čujem  
And the local society  
odlazi dolazi

Hej, ruke  
preko zvijezda pad, pad  
u kose padam sad, sad

Okrenula leđa  
a crveni vjetar  
mi mrsi ruke



*Dosta mi je...*

Dosta mi je bijelih meteora  
po crnom nebu  
i zabrana na javnim mjestima  
sad ћu maznut pravu trebu  
i odati se stvarima divnim

Hoću živjet lagane pjesme  
i svirati divlji ritam  
Svi će plesati u mome klubu

*Vraćaš se...*

*Vraćaš se u domovinu:  
u holu željezničke stanice golubovi  
miris vlažnih mrvu kruha  
u papiru, u plastici  
Izboran i zabrinut  
stisnutih jagodica  
između raširenih koljena i praznih šaka  
pogledom od ozdo traži svoj obrok*

## ***Nebo...***

Nebo ogledalom postaje  
pristavši na svjetlucanje grada  
Noć je, zna se, zvuci već mijenjaju  
pravac – postajem izvor ritma  
Razglašavam, tek me čuju bljesci  
o kojima sam šutio čitav dan, kvarcne  
mòre samoće  
šišmiš u praznom gubi kontrolu  
i katranom krila skriva prah.  
Tako, opsjednut pjesmom ponavljam igru iz  
djeticinstva:  
Dan će me dočekati – u pari oblaka  
ili prašini grada

## ***Put je...***

Putnik:

Put je ravna narančasta linija  
Arhitektura se topi u prorezu  
između tla i neba. Neprekidnog.

Kroz kvarnu opnu vozila pristižu kontrasti podneblja  
Kule i male figurice. Prašnjave sumporom.  
Kilometri procesije pozitivne historije.

Pješak:

Opasna blizina tijela najrazličitijeg porijekla.  
Vlažnih. U zamci zidina i paučine.  
Kroz prašinu puta svjetluca limeno kretanje (putovanje).

Odjeća se osipa u povećanoj neprekidnoj liniji horizonta.  
Koketna u promicanju izduženih sjenki.

(Iz Dnevnika s putovanja)



### *Na granici elemenata...*

Na granici elemenata  
niski let galebova  
besmisleno svjetlo svjetionika koje ništa ne osvjetjava  
do tragova zraka i isparenja  
Jedro između mora i neba

Na granici elemenata  
niski let galebova je sumanuta utjeha  
vertikalnog niza nabora  
u vedrini mora i neba

na granici elemenata  
duboki šiljci u kamenu tjeskobom bodre  
privatni agon nagrizenih  
pramenova i mantila  
u vedrini mora i neba  
šiljata stabljika mišljenja  
besmisleno svjetlo svjetionika koje ništa ne osvjetjava  
do tragova zraka i isparenja  
Jedro između mora i neba

### *Osvijestiti se...*

Osvijestiti se upijajući praznine mehanih  
rubova vrtoglavih dubina. Tišina ozona  
i rađanja formi.

Relativizirati tačnost horizonta smjernog  
pred mojom vojničkom crtom. Dok ironizira tačku našeg  
susreta mijenjajući joj podtekst. U svojoj blagosti  
vihori što ostaje iza perja.

Izgubiti se tvrd i ubijeđen između bljeska  
limenih krila i razlijevanja asfalta. Dok  
se čula ostrve i pojmovi oslobađaju. Poletiti  
kao simbolična replika onoga što sam bio.  
Ploča nestvrdnutog gipsa i neshvatljivih obrisa.

(Čekajući na polijetanje Rim – Sarajevo, 19. 3. 1989.)

## **Biti znakom**

Bešćutno stajati gledati  
u pogled neshvatanja  
bešćutno stajati gledati  
u tankom polju djelovanja  
bešćutno stajati gledati  
iza ramena negdje kuca smisao

## **Tijela su nam od samih pojnova**

Dok ležimo u mraku iza žaluzina  
negdje iza daleko funkcioniramo savršeno  
u malom se nebu stapamo i razlažemo  
u jatima sivih sjenki

Zaspemo li zvonjava naših slogova  
prazninom između tijela  
plašiće kao što u djetinjstvu plašiše nas.

## **Koračati**

(A. B. Šimiću)

Kada stupa, tijelo je ptica u zaletu  
Potom korak je igra teže i lakoće

Savijanje šešira u niskom kasu  
nebeska je slika koračanja

Svaki obod bliži je ptica što se rađa  
dalji, to je pobjeda zemlje

Pobjeda zemlje je u trajanju  
igre teže i lakoće gdje konačno  
izgleda metafora ptice ili kamena

## Izazovnost

Polomljeno tijelo njiše se pod licem žene  
sklonjene pod namreškanu granu kestena.

Uglačana gaza rasprskava pogled žene  
prije nego li stigne oštetiti  
postojeće stanje stvari  
još u životu.

Iza njenog prekobrojnog smiješka  
prozor otvara u lomaču.

Kada bi se bilo odista tekućinom, piše  
ispod fotografije, imali bi sve što je nadohvat ruke.

preko lakta i tjemena tkanina  
nategnuta razblažuje boju žene  
da razodjenuto tijelo ne potjera  
moje tijelo brzi korak naprijed.

i

sleđen me prst lovca pokazuje hrastovima  
prije nego ustrijeli divlju životinju  
skrivenu iza rožnatog okvira slike.

u brzom pogledu na pokućstvo  
sa ovog rastojanja vidim i poruku:  
kada bi se odista u slikama bilo,  
stoji ispod fotografije roditelja, bilo bi sve nadohvat ruke.


*Diješ tijelo...*

Diješ tijelo sa trešnjina cvijeta  
a iznad koljena mogu pročitati strepnju Rima od mladog pobunjenog roba.  
Sada, poslije 2.357 godina, smiješna svećenice izlazećeg Sunca!  
Reći će ti šta je mudrost:  
Prometej se i dalje junači  
iako ništa ga ne boli i ne osjeća.  
Tu stoji vječnost njegova,  
japanska sijalica u potkroviju Evrope.



### *crtež je potreban...*

crtež je potreban  
povlačim linije  
obeshrabruje me saznanje da se bilo kako povučena linija pretvara u krug:  
beskonačnost je na dohvati ruke  
upravo s tom rukom imam najviše problema:  
čudna muskulatura, nepravilno podrezani nokti,  
reumatični zglobovi... iskrivljuju moje linije  
ako se svaka prava linija putujući u beskonačnost  
blago iskrivljuje,  
možda se skriva linija na istoj putanji zaista iskrivljuje  
onda su prostor i vrijeme tamnica mozga  
onda sam ja loš crtač  
na zidu svoje praistorijske pećine ostavljam poruke beznađa  
potomstvu koje jedva naslućujem  
vrag me odnio ako znam zašto to činim  
uzalud ostavljam poruke  
zaraćene strane priprostim sredstvima teže komplikovanom cilju  
sjeo sam na snop svjetlosti i putujem u beskonačnost  
cilj je amplitudinalan.



*Nestao sam...*

Nestao sam u njoj  
kao prva kap rose  
na požudnoj usni


*Mi smo kao jele...*

Mi smo kao jele. režite nas da vidite blago čilibara.  
od zapaljene smole gori cijelo stablo. i vaše lice.  
i srce dabome. i svako blisko srce redom kada venjenje uđe u buket. požar u ravnici  
napreduje kao zapaljenje u plućima. u vrelom tunelu nestaju slike.



### *Ledeni dodiri...*

Ledeni dodiri pijesak tjeraju na rascvjetalo tjeme. između oblaka roj ptica pada,  
bode i bude kalup školjki i utonulih posada. o meni pišu. i o moreplovima jer ja sam  
vreteno od kože, i o suhim cvijetom od tjemena. iz mene od sezonske muke sipa žito.  
u oblaku ljuskica žutih trava. u sobi dječaka jastreb. sjeme u porama tmine i s porama  
iz visine. od tog tijela morem utonulih bubre i pupe.



### *ptice se bore...*

ptice se bore za ovaj komad neba: sami u sebi  
talasaju se vrhovi građevina.  
nad vrućim poljima gdje se tijelo odvaja  
kao balon od djeteta. ništa ne dijeli od sunca, ni silueta.  
grozno je kazati, kao jezik pod cirkularom.  
nedokučivo plutanje tijela u tečnosti, kao djevojčica  
prvi put blizu konja:  
tog komada neba nas je strah.

to je pitanje neba,  
mala figura i kraj nje fatamorgana.  
to jeste fatamorgana.

fatamorgana je nesposobnost drugih tijela da se dotaknu.  
– blok ledena zraka.  
– balon je vrelog zraka.  
slučaj je bezobrazno i odvažno masturbiranje  
intime. opće mjesto se mreška iznad vrelog pijeska.  
ali naša intima prebiva u stvarnosti, obje na duši  
ovog stoljeća?


## *otvaranje...*

otvaranje. tek se budiš a tijelo je već hladno. zastori dijele a onda miris stajačice otiče u razbuđeni grad. sanjala sam, kažeš, smrt twoju. kao da to ne znam. otvaram i ja. svježina jutra zaustavlja pokretne sličice noći. smrznuto tane tik do čela lebdiće cijeli dan. sada se gledamo. noćas su Te maljave tuđe mekane ruke vodile da legneš pored. ukrasna vrpca u vosku od pečata. morao sam biti smiješan u blijedoj puti. slučajan oblik krasa koji čini prevlaku u moru. odbijala si kraj mog mrtvog tijela cijele noći. vani je padaо snijeg u visoke dimnjake. a onda susjedi počinju otvarati duše djeci. do tada je ostala elipsa od uglja na prozorskom staklu. znak sADBINE kada traga. nadmetanje zraka i plamena dok spavamo. tvoje male osvete: sanjaš i oko madeža na smrznutom danu urezuješ crtice. usamljene ptičice koje padaju u bare. čekaš li, pitam, jedva proljeće. smiješiš se. pitaš, vidi evo zube, da li su oštiri? sada se gledamo.

*crni obrisi ptica...*

cmi obrisi ptica su izlijepljeni po vedrom svodu  
sve boje u nedogled izbijaju tople u suhoći  
dijagnozu veli umjetnik, doktor za ljepotu

iako je ljeto, umaram se poput dječaka  
već sanjam slike iz holandskih pejzaža



## **ubojsstvo prvo (isključivo iz nehata)**

crvena mrlja i bijela mrlja  
mogle bi biti plod i knjiga.

možda i crv i naslov  
da ne skrene pogled

te siva mrlja i plava mrlja  
postanu nervozno jato  
leteći iznad mrtve prirode

Sarajevo, 17. 5. 1989.

## **za blok o starcu**

(fragmenti govora o crnom suncu)

posljednje pismo posljednjim čini intonacija, raspored praznina, šupljina između stvari koje se imaju reći. šupljine odzvanjaju.

između vertikalnog i horizontalnog, more kutova koji jedva čekaju da glave polože na tlo, ionako, sve je mjerljivo privatnim pojmovima o vlastitom dobu, na primjer.

Obznanjujući, odmiče se dublje, predajući ključ znakovlja, pomjera se u pojmove i dublje, s računom na misao koje drži oko knjige, jedne ili ove.

borba za osjećanja, vlasničko pravo nad emocijama, i podvale važe.

oblici zadržavaju nešto što upućuje na njihovo porijeklo, kada umjetnik ubija opisujući kako sve to zamišlja u oblicima i njihovom tihom, muklom jeziku, svijet se ispuni tupim udarcima tijela.

više zraka, više zraka, simuliranja oblika!

jednom je kazala – ta pjesma ti najviše liči, dopada mi se, uhvaćen u kavez, u zamku, iz te pjesme nisam izašao

ona će znati više o meni i bolje, kao ja o njoj, neće nam to pričinjavati teškoću, dapače, živjet ćemo kao slikar i pisac, dva zbumjena parazita koji su za domaćina izabrali drugog.

*preostaje udjel sna...*

preostaje udjel sna,  
baciti se u čišće predjele.  
od čišćeg zraka šuškavi se trzaju  
jesenji listovi potkradenih krošnji.

kada se uključe u beskraj  
šahovske ploče a na njoj ljutite  
figurine se pretvore u sol možda,  
najbolje će biti da ostanu u tišini.

## *utisnuti se u jutra...*

utisnuti se u jutro i jednako svjež nestati –

spremni (smo) na borbu bez tijela,

od pijeska,

onog istog dok ga natmureni Morandi pažljivo sklanja ispred razigranog konobara.

natura morta! u fantazmi – vrč i čaša.

a sa lijeve strane na mjestu strgane ruže

moglo bi ušetati i dalje očekujem

nešto

čemu se ne sjećam imena i skriveno je u pjesmi koju

sam napisao

kao dječak

a naslov joj je sensoria.

trčati dalje, skok je već dovoljno prostora da tijelo vidi

zamiranje tjelesnosti, u jednoj tvrdoj točki bi moglo da se sijeku

paralele u sjećivu, bez mog znanja, ali

vidim rascvjetalu siluetu orla od krvi na mom pulsu u letu.

klizim kuda vode kao čempresi more, rat! mali u dvije boje:

komadi katrana pužu bjelutcima.

TAMO U NIČEMU JE POGLED I RAZJEDA MRAK

kada se gazimo i kosti obrastamo

vremenske promjene postaju važne.

iza oblaka gledati čist  
zaboravljući  
plot  
vraća oblik  
u nebu

U

N

E

B

U

u nebu, uz neki kat, kapija krivih borova gdje se pali svjetiljka



## **problem u praznini**

I.

stariji muškarac razvijenih udova  
slovi  
za pismena, o pismenju slovi.

zemlja je puna problema

II.

eto, moglo je biti lagano  
izrešetano prijepodne plodovima višnje  
ili trešnje, svejedno, već u ljetu trunu.

III.

žena u plavoj haljini prolazila  
pored zadružog doma, pored  
crvene opeke stajao plavi pauk.

IV.

zemlja je puna problema i puca joj  
u susretu mekog zvuka, blondi kose  
i crne pete dizalice, dresa strašne glavobolje.

V.

zemlja je prepuna problema.  
mreža zatvorenih i otvorenih rupa  
u pravougaonicima i suzama.

VI.

ljeti višnje napuštaju rupe  
u živome pejzažu zrijenja  
da u cvijeću popune, suhe, čašice  
razbijene između kamenih ploča.

VII.

u subotu gumeni kotači pauka  
gnječe poliranom stazom i prljaju okolicu  
kao družina dječaka, kao hor slonova iznad rupe  
klate opuštene udove.

VIII.

moglo je biti poslijepodne  
uobličeno od dizanja lakiranih kola  
i ljupke prijetvorbe u budoaru  
plave haljine u limun žutu.

IX.

zemlja je puna problema.

stariji muškarac je sjenka  
iza nezadovoljnoga govornika.

stariji muškarac kao stariji pjesnik.

X.

život žene u plavoj haljini  
duhovi su jednom pohodili,  
kada je već sama digla ruke i sjećanja.

XI.

pauci su krunica erotskih snova  
gledajući iz jame, spremni da protegnu  
slipave rilke do hrastove škrinje.

XII.

stariji muškarac efektno završava  
šekspirovskim grčevima izlažući tijelo.  
cijelo društvo opušteno motri porađanje  
logosa iz pjesničkog mantila razvijenih formi.

XIII.

mogla je biti i polarna noć  
u koju nestaje pjesma o ljubavi i smrti  
plavog pauka i odjevene žene.

XIV.

piće od žutog pelina ulijeva krijepost i znanje,  
muškarac još značajno misli da bi promišljeno  
zemlja stala kad bi znala koliko je samo puna.

2. 8. 1990.



## **bufera**

oluja, najjača u ovom stoljeću je, kažu, svuda uokolo  
stana uklesanog u zid zgrade kraj parka.  
tu pišem, kako to samo ja znam,  
barbari su me protjerali sa brda na kojem  
sam vješto kalemio voćke sa mačkama i puštao nove slike u svijet.  
opkoljen barbarima, oluja olakšava prve riječi  
izgnanome u novi život, rođenom sa već pokvarenim  
zubima, umorne seksualnosti, zaboravljajući ljepotu

*na naslijeđenom pisaćem stolu...*

na naslijeđenom pisaćem stolu, naslijeđena  
pisaća mašina pokazuje mrtvilo prirode  
zajedno sa pjesmom o kojoj sanjam  
otkako se veseli čovječuljak povukao  
u prirodu naslijeđenu od ljudi  
koje nisam poznavao, za koje čak i ne znam  
da li su ljudi

### *Filip je na drugom kontinentu...*

Filip je na drugom kontinentu i plače  
sjećajući se jezika ševe mog  
pornografskog romana u nastavcima između  
praznina u tijelu i identitetu.  
Kako Filip prezivljava kroz mene?  
kao skulptura  
Filip pamti tijelo skvrčeno oko sebe,  
Filip pamti trapezoidno ogledalo  
na kojem je uljanom bojom lavande  
od prvog susreta stajalo  
da nema više vremena, uokvirujući  
parove organa kao da se slike rasplinjavaju  
ideja skulpture na papiru knjige Sensoria  
Filip prezivljava kroz mene smrznutog  
čovjeka u zamahu za nečim, zagrljajem sa nekim  
koga nema ni u rupi u ledu kojom se predstavlja

N. Y., 1995.

